



La Ministre déléguée auprès du Premier
ministre, chargée des Médias et de la
Connectivité

Gemeinsam Äntwert vun der delegierter Ministesch beim Premierminister fir Medien a Connectivitéit a Justizministesche Elisabeth MARGUE souwéi vum Minister fir Wirtschaft, PME, Energie an Tourismus Lex DELLES op d'parlamentaresch Fro n°1165 "Fake news sur les réseaux sociaux" vum 10. September 2024 vum honorabelen Deputéierten Sven CLEMENT.

Ad 1. bis 4.

Aktuell gesäit déi lëtzebuergesch Legislatioun keng spezifesch Infraktioun vir, déi d'Verbreede vu falschen Informatiounen kriminaliséiert. Wann esou falsch Informatiounen physisch oder juristesche Persounen betreffen, kënnen awer d'Artikelen 443 bis 452 vum Code pénal, déi sech op Diffamatioun, Calomnie a Beleidegung bezéien, ugewannt ginn. Fir déi Fäll, wou et sech dann ëm Bedruch handelt, kënnen d'Artikelen 496 bis 504 vum Code pénal ugewannt ginn. Fir allgemeng Statistiken zum Sujet "Fake news" kann op d'Äntwert op d'parlamentaresch Fro n°1111 „diffusion d'informations fausses sur les réseaux sociaux“ vum 20. September 2024 verwisen ginn. Am informatesche System gëtt bei dësen Statistiken net ënnerscheet, ob dës Infraktiounen online oder offline gemaach gi sinn. Deemo ass och eng Opdeelung no Online-Plattform net méiglech.

Wat spezifesch de Gebrauch zu frauduléisen Zwecker vun offizielle Logoën ugeet, kënnen mir den honorabelen Deputéierten och nach op d'Äntwert op d'Fro n°5339 vum 21. Dezember 2021 verweisen, wou d'Dispositiounen vum Code pénal mat zousätzlechen Explikatiounen zu dësem Sujet duergeluecht gi waren.

Ad 5. bis 6.

Fir illegal Contenten an Desinformatioun ze bekämpfen, gouf déi bestoend national Gesetzgebung viru kuerzem op europäeschem Niveau duerch d'Reglement (EU) 2022/2065 iwwert de Bannemaart fir digital Servicer (de sougenannten "Digital Services Act", kuerz "DSA") ergänzt an harmoniséiert. Dësen Text, deen de 17. Februar 2024 a Kraaft getrueden ass, huet d'Zil Online-Plattformen am Kampf géint d'Verbreedung vun illegalen Inhalter ze responsabiliséieren an d'Verbreedung vun illegalen oder schiedlechen Inhalter virun allem duerch eng besser Preventioun ze reduzéieren.

Déi Online-Plattformen, déi ënnert den DSA falen (zum Beispill sozial Netzwierker, Video-Sharing Plattformen oder Online-Maartplazen) mussen Mechanisme schafe fir géint illegal Inhalter virzegoen. D'Notzer vun de Plattformen mussen d'Méiglechkeet hunn, d'Plattform iwwer potenziell illegal Contenten direkt ze informéieren. Dono muss d'Plattform déi Contenten iwwerpräiwen an esou séier wéi méiglech eng Entscheedung treffen. Soubal d'Plattform Kenntnis vun illegalen Inhalter op hire Servicer kritt, ass si dozou verpflichtet séier ze handelen fir dës Inhalter ze läschen oder den Zougang zu dësen Inhalter ze blockéieren.

Wat d'Desinformatioun ugeet, schafft den DSA verstärkt "due diligence"-Verpflichtunge fir sozial Netzwierker, déi am DSA ënnert de Kritter vun de "ganz grouss Online-Plattformen" falen. Dëst sinn all d'Plattformen, déi méi wéi 45 Milliounen aktiv Utilisateuren hunn (zum Beispill: Facebook, Instagram, LinkedIn oder X (fréier Twitter)). Den DSA verpflichtet dës grouss Plattformen, Mesuren ze huele fir méi transparent a méi proaktiv géint falsch Contenten virzegoen, déi duerch hir Servicer verbreet ginn. Si mussen intern Prozeduren schafen, fir falsch Informatiounen op hire Servicer ze identifizéieren an d'Risiken ze reduzéieren, déi mat Desinformatiounscampagne verbonne sinn. Am Fall vun engem Verstouss géint den DSA, kënnen déi zoustänneg Autoritéiten eng Geldstrof verhängen vu bis zu 6% vum globalen Ëmsatz vun der Plattform.

Déi Europäesch Kommissioun ass zoustänneg fir d'Konformitéit vun de groussen Online-Plattformen mat dësen Obligatiounen ze iwwerwaachen an huet an dem Kontext den 18. Dezember 2023 eng formell Prozedur géint X (fréier Twitter) opgemaach, wéinst presuméierte Verstéiss géint d'Obligatiounen vum DSA. Zu Lëtzebuerg bestëmmt de Projet de loi n°8309 d'Konkurrenzautoritéit als nationale Coordinateur fir digital Servicer ("Digital Services Coordinator", kuerz "DSC"). Si ass deemno fir d'Kontroll vun all den Online-Plattformen, déi zu Lëtzebuerg etabléiert sinn, zoustänneg. Den DSA schreift vir, dass déi 27 EU-Memberstaaten en nationale Coordinateur nennen.

Am Kader vun der Ëmsetzung vum DSA huet d'Konkurrenzautoritéit Aarbechtsgruppe geschaf, fir eng Koordinatioun mat de relevante sektoriellen Autoritéiten, déi fir verschidden Typen vun illegale Contenten zoustänneg sinn (ënnert aneren d'ALIA, d'Police, den ILNAS an d'CNPD). D'Konkurrenzautoritéit schafft och mat der Europäescher Kommissioun an den DSC vun deenen anere Memberstaaten zesummen. Mir géifen den honorabelen Deputéierten nach op d'Äntwert op d'parlamentaresch Fro n°1111 vum 20. August 2024 verweisen, déi weider Detailer zu enger änlecher Ufro beinhalt.

Zousätzlech spillt de "Code of Practice on Disinformation" vun der Europäescher Kommissioun eng Roll. D'Zil vun dësem Outil ass et, manipulativt Verhalen online, esou wéi d'Verbredung vun Desinformatioun, ze reduzéieren, an dëst notamment duerch eng méi staark Zesummenaarbecht tëscht de Signataire, wat Techniken, wéi beispillsweis falsch Profiller, Bots, oder och "deep fakes" ugeet.

D'Regierung geet géint d'Desinformatioun awer och verstärkt duerch Preventioun a Medienerzéiung (éducation aux médias) - an alle Beräicher a fir Bierger vun all Alter - vir. An dësem Beräich huet d'"Autorité luxembourgeoise indépendante de l'audiovisuel" (ALIA) d'Missioun, déi verschidde sektoriell Efforten ze encouragéieren a weider ze entwéckelen. Dëst gëtt och duerch Initiativen, wéi den "European Digital Media Observatory" (EDMO), ënnerstëtzt. D'"Desinformatioun" an déi verschidde Méiglechkeeten effikass dergéint virzegoen an eis Demokratie ze schützen, wäert och d'Thema vun der Ofschlusskonferenz vum 4. Dezember 2024 sinn, déi am Kader vum Konferenzzyklus iwwer d'Mediereform organiséiert gëtt.

Lëtzebuerg, den 9. Oktober 2024

Déi Delegéiert Ministesch beim Premierminister
fir Medien a Connectivitéit
(s.) Elisabeth MARGUE